

LEKSYON 12
ANG KATAPUSAN
MONG PULUY-ANAN



Matun-an Nimo Niining Leksyona

Ang Imong Pagpili

Usa ka Kahibulongang Puluy-anan

Kauban kang Jesus
 Puluy-anang walay katapusan
 Bag-o ug dili madunotong lawas
 Usa ka kahibulong pamilya

Sa Imong Pagpauli

ANG IMONG PAGPILI

Ang usa ka malipayong panimalay dinhi sa kalibutan maayo man, apan ayaw hikalimte nga kining kalibutana dili mao ang imong dayong pinuy-anan. Matag tawo niining kinabuhia kinahanglang magapili kon asa siya paingon alang sa iyang walay katapusang puluy-anan.

Si Satanas nga naningkamot sa pagbungkag sa imong panimalay dinhi sa kalibutan gustong moadto ka sa impiyerno kauban kaniya aron magaantus ikaw sa walay katapusan.

Mateo 25:41. Pahawa gikan kanako, kamong mga tinunglo, ngadto sa kalayong walay pagkatapos nga gitagana alang sa yawa ug sa iyang mga manulonda.

Si JesuCristo nga nagapanalangin sa imong panimalay dinhi sa kalibutan nahigugma kanimo ug gustong mokuha kanimo uban Kaniya aron sa pagkalipay didto sa kahibulongang puluy-anan sa langit.

Juan 14:1-3. Si Jesus miingon kanila. . . Sa balay sa akong Amahan anaay daghang puy-anan, ug. . . mag-andam akog dapit alang kaninyo. . . . Mobalik ako pag-usab ug pagadawaton ko kamo nganhi uban kanako, aron nga diin gani ako atua usab kamo.

Sama sa imong pagpili kon kinsa ang imong mahimong kapikas sa kinabuhi, kinahanglan nga magpili ka usab ug usa, si Satanas ba o si Jesus. Si Kinsa sa duha ang imong gustong ikauban hangtud sa kahangturan?

Buhata Kini

1. Basaha ang Mateo 25:41 ug Juan 14:1-3.
2. Asa dapit ang gusto ni Satanas nga imong adtoan human ikaw mamatay?
.....
3. Asang dapita ang gusto ni Jesus alang kanimo.
.....
4. Asang dapita ang imong gusto.
.....
5. Kinsa ang imong gustong ikauban hangtud sa kahangturan -- si Jesus o si Satanas?
.....

USA KA KAHIBULONGANG PULUY-ANAN**Kauban kang Jesus**

Ang usa ka malipayong kristohanong panimalay nga puno sa gugma maoy usa ka hulagway sa imong pinuy-anan didto sa langit. Apan, ang labing maayong panaghigugmaay sa bana ug asawa usa lamang ka gamayng landong sa gugma taliwala kang JesuCristo ug sa tanang midawat Kaniya ingon nga Manluluwas.

Modawat Siya kanimo ngadto sa puluy-an nga Iyang giandam alang kaninyo. Ang ganghaan binuhat sa perlas, ang dalan bulawan ug wala nay gabii tungod kay ang siyudad napuno sa kahayag ug sa himaya sa Iyang presencia.

Pinadayag 21:3, 4. Tan-awa, ang puluy-anan sa Dios anaa uban sa mga tawo. Ug iyang pagapahiran ang tanang luha gikan sa ilang mga mata, ug ang kamatayon wala na; ug wala na usab unyay pagminatay, ni paghilak, ni kasakit.

Buhata Kini

6. Basahaang Pinadayag, capitulo 21 ug 22.
7. Pasalamat si Jesus alang sa kahibulongang puluy-anan nga iyang giandam alang kanimo.

Puluy-anang walay katapusan

Dinhi sa kalibutan daghang mga tawo nawad-an ug puluy-anan tungod sa sunog, linog, lunop o gubat. Dili na gayud kita maguol nga mawad-an ug puluy-anan didto sa langit. Gibayran na ang tanan ni Jesus. Siya naghatag sa iyang kaugalingong kinabuhi aron kita maluwas gikan sa gahum ni Satanas aron kita makig-ambit sa Iyang langitnong puluy-an sa walay katapusan. Ingon nga pangasaw-onon ni Cristo, dili na gayud kita hinginlan gikan sa walay katapusang puluy-an. Walay kalayo nga makabungkag niini. Dili na kini kinahanglang ayohon. Walay kawatan nga makakawat sa atong bahandi.

I Pedro 1:4, 5. Ug ngadto sa usa ka panulondon nga dili madunot, dili mabuling, dili malawos, ginatipigan didto sa langit alang kaninyo nga mga ginabantayan sa gahum sa Dios pinaagi sa pagtoo alang sa kaluwasan nga andam na aron igapadayag unya na kinaulahi pang panahon.

Mateo 6:20. Pagtigum kamog mga bahandi alang kaninyo didto sa langit diin walay tangkob ni taya nga magakotkot ug diin walay mga kawatan nga magapanakasaka ug magapangawat.

Buhata Kini

8. Unsang biliha ang gihatag ni Jesus aron sa paghatag kanatog puluy-anan didto sa langit?
-

Bag-o ug dili madunotong lawas

Bisan ang labing-malipayong panimalay sa kalibutan makasinati usab ug panahon sa kasakit ug kaguol; panahon diin ang mga bata magahilak sa balatian ug kasakit; panahon sa dihang ang kamatayon magadala ngadto sa panagkabulag ug kasubo. Wala nay ingon niining mga butanga didto sa atong walay katapusang puluy-anan! Ang atong lawas mausab ngadto sa pagkasma sa lawas ni Jesus human Siya mabanhaw.

Filipos 3:21. Siya ang magausab sa atong timawa nga lawas aron kini mahisama sa iyang mahima-yaong lawas, pinaagi sa gahum nga nakapahimo kaniyang takus sa pagsakop sa tanang mga butang sa ilalum kaniya.

I Corinto 15:42, 43. Ang lawas nga igatisok madunot ra, apan ang lawas nga unya pagabanhawon dili madunot Kini igatisok nga mahuyang, apan kini pagabanhawon unya diha sa kadungganan.

I Juan 3:2. Kita karon mga anak sa Dios; kon maunsa unya kita, kini wala pa ipakita, apan kita nasayud nga sa igapadayag na Siya, kita mahisama Kaniya, kay kita magasudong man unya Kaniya sa iyang pagkamao.

Buhata Kini

9. Sag-uloha ang Filipos 3:21 ug I Juan 3:2.

Usa ka kahibulongang pamilya

Gusto ba ikaw nga makig-uban kanimo ang imong mga hinigugma sa kinabuhi didto sa langit? Usa ka labawng ganti ang imong madawat tungod sa imong mga paningkamot sa pagdala sa imong pamilya ug mga higala ngadto kang Cristo.



Ang kinabuhi didto adunay kalainan sa kinabuhi dinhi. Ang kinabuhi sa panimalay lahi na, apan ang tanan nga atua sa langit adunay dili matugkad nga gugma ug panaghiusa kay sa atong masinati dinsi sa kalibutan. Ang tagsatagsa adunay iyang bahin sa hingpit nga panimalay sa Dios.

Bisan tuod nga aduna na kitay bag-o ug kahibulongang lawas, magkainilhanay pa gihapon kita. Atong mahinumduman ang kinabuhi sa kalibutan. Sa panahon sa hapit na mamatay, daghang mga kristohanong naka-kita sa langit, sama ni Esteban, ang unang martir. Ang uban nakadungog sa mga manulonda nga nanag-awit. Ang uban nakakita sa ilang mga hinigugma sa kinabuhi nga tua na didto nga nagaabiabi kanila sa ilang langitnong puluy-an

Lucas 16:23, 25. Giyahat niya ang iyang mga mata ug iyang nakita si Abraham didto sa halayo ug si Lazaro diha sa iyang sabakan. Apan si Abraham mitubag kaniya: “Anak, hinumdumi nga sa buhi ka pa”

Mga Buhat 7:55. Si Esteban . . . mitutok sa langit ug nakita niya ang himaya sa Dios ug si Jesus nga nagtindog sa too sa Dios.

Hebreohanon 12:22-24. Apan kamo nanagpaka-duol na ngadto sa bukid sa Sion ug sa lungsod sa Dios nga buhi, sa langitnon nga Jerusalem, ug sa dili maisip nga manulonda nga nanagtigum sa pagsadya, ug sa katilingban sa mga panganay kinsang mga ngalan nahisulat sa talaan didto sa langit, ug sa maghuhukom nga mao ang Dios sa tanan, ug ngadto sa mga espiritu sa mga tawong matarung nga nangahimong hingpit, ug kang Jesus ang tigpataliwala sa usa ka bag-ong pakigsaad.

Buhata Kini

10. Basaha ang Hebreohanon 12:22-24 pag-usab.
11. Magkainilhanay ba kita didto sa langit?
.....
12. Pag-ampo alang sa imong pamilya nga kamo magakitaay didto sa langit.

SA IMONG PAGPAULI

Ang sugilanon ni Rebeca ug ni Isaac sa Biblia maoy usa ka matahum nga hulagway sa usa ka kristohanon sa iyang pagpauli ngadto sa langit. Si Abraham nagpadala sa iyang sulogoon aron sa pagpangita ug asawa alang sa iyang anak nga si Isaac. Sa dihang si Rebeca ang napili, iyang gidawat ang pagdapit dihadhiha. Iyang gibiyaan ang iyang panimalay ug dapit ug mipanaw sulod sa daghang mga adlaw ngadto sa iyang bag-ong puluy-anan. Diha sa dalan ang sulogoon maoy nagatagbo sa iyang tanang gikinahanglan, nagapanalipod kaniya gikan sa kadautan ug nagpahiluna kaniya nga mainampingon ngadto sa balay ni Isaac.

Sa mao usab nga paagi, ang Dios nagpadala sa Iyang Balaang Espiritu dinhi sa kalibutan aron sa paghanyo kanato kon biyaan ba nato ang atong daang kinabuhi nga makasasala ug moadto sa pagpakig-uban sa Iyang Bugtong Anak nga si JesuCristo didto sa langit. Sa gutlo nga imong pangayoon sa Dios ang pagpasaylo sa imong mga sala ug dawaton si JesuCristo nga imong Manluluwas, ikaw nagpadulong na sa langit. Hinoon, kinahanglang magmalipayon ka sa pagbiya sa tanang mga butang nga dili maayo sa imong kinabuhi. Imong buhaton kon unsa ang gisulti sa Dios kanimo diha sa Biblia, sama kang Rebeca nga misunod sa sulogoon ni Abraham bisan asa siya gidala.

Unsa ka kahibulongang kinabuhi ang imong masugdan sa dihang dawaton nimo si Jesus ingon nga Manluluwas! Sa dihang imong tugotan ang Balaang Espiritu sa paggiya kanimo, ang kinabuhi mahimong maayo. Ang imong kaminyoon mosamot pagkamaayo. Labaw sa tanan, aduna usab ikaw usa ka mahimayaon ug walay katapusan nga puluy-anan didto sa langit kon ang kinabuhi karon matapus na.

Pag-ampo

O, Dios, salamat sa Imong gugma alang kanako. Salamat sa imong pagpili kanako aron sa pagpakig-uban Kanimo hangtud sa kahangturan ug sa Imong Anak nga si JesuCristo didto sa langit. Salamat sa imong pagpadala sa Imong Anak nga si Jesus aron sa pagpakamatay alang kanako. Salamat kanimo Jesus, sa pagkuha sa silot sa akong mga sala.

Pasayloa ako sa tanan nakong sayop nga nahimo ug himoa ako nga hustong tawo nga buot mo. Akong gitugyan ang akong kina-buhi Kanimo. Salamat sa imong pagpadala sa Balaang Espiritu sa paggiya kanako ug pag-tabang kanako adlawadlaw ug sa pagdala kanako diha sa langit.

Karon Ginoo, Panalangini ang akong panimalay ug tabangi ang tanang sakop sa akong pamilya nga magkinabuhi alang Kanimo. Panalipdi kami gikan sa kadautan hangtud nga Imo kaming kuhaon ngadto sa langit. Sa ngalan ni Jesus, Amen.

Buhata Kini

13. Kon mao kini ang imong pag-ampo, basaha kini sa makusog ngadto sa Dios. Unya pakigsulti Kaniya sa imong kaugalingong pinulongan. Pasalamat siya sa imong natun-an niining basahona ug pangayo Kaniya sa pagtabang kanimo sa pagbuhat niini.
14. Itandi ang imong mga tubag sa mga tubag nga makita sa katapusan niining leksyona.
15. Sulati ang imong rekord sa estudyante alang sa leksyon 12.

PAHALIPAY!

Natapus na nimo ang mga leksyon niining kursoha. Karon, sunda ang mga pahimangno sa katapusan sa mga pangutana sa leksyon 12 diha sa imong rekord.

Pag-ampo alang sa Bag-ong Magtiayon

O Dios sa gugma, Ikaw ang nagamugna sa kaminyoon alang sa kaayohan ug kalipayan sa katawhan. Ikaw man ang nagatukod niini ug uban lamang Kanimo nga kami makabuhat niini nga malipayon. Ikaw nag-ingon, "Dili maayo alang sa tawo nga mag-inusara. Magbuhat Ko alang kaniya ug katabang." Ug karon, nadoble ang among kalipay tungod kay ang kalipay sa usa mao man usab ang kalipay sa usa. Ang among kabug-at nga gidala migaan tungod kay amo silang katambayayungan.

Panalangini kining bana Ginoo. Panalangini siya ingon nga maoy magatagbo sa ilang adlaw-adlawng pangkinahanglan ug tabangi siya sa mga kabug-at sa pagpangita sa pagkaon. Himoa nga ang iyang kusog maoy magapanalipòd sa iyang asawa, ug himoa ang iyang kinabuhi nga maoy dapit nga gipangandoy sa usa ka babaye nga pasilungan.

Panalangini kining asawa Ginoo, Hatagi siya sa kaaghop nga makapadaku kaniya, usa ka halalum nga pagbati sa pagkamasinabuton, ug dakung pagtoo Kanimo. Hatagig kaanyag ang iyang kalag nga dili gayud molubad, ang walay katapusang pagkabatan-on nga makita lamang sa pagkupert sa mga butang nga dili madaan.

Tudloi sila nga ang kaminyoon dili lamang ang pagpakabuhi alang sa usag usa; kondili ang duha nahimong usa ug nagakahiusa ang ilang kamot sa pag-alagad kanimo. Hatagi sila sa usa ka dakung espirituhanong katuyoan sa kinabuhi. Hinaut Ginoo nga sila magapangita sa gingharian sa Dios ug sa Iyang pagkamatarung, ug ang ubang mga butang igadugang ra kanila.

Hinaut nga dili nila pangitaon ang pagkahingpit diha sa usag-usa kanila, nianang pagkahingpit nga anaa lamang Kanimo. Hinaut nga sila magapagamay sa ilang mga kaluyahon, madali sa pagsulti sa pagdayeg, ug magapadaku sa ilang katahum ug kusog, ug magatan-aw sa usag usa pinaagi sa mahigugmaon ug mapailubong mga mata.

Himoa nga ang ilang mga buluhaton ug katungdanan alang kanila mahimutang diha sa Imong kabubut-on nga maoy magapanalangin kanila ug maga-ugmad sa ilang batasan samtang silang magakauban. Hatagi silag igong luha nga makapaaghop, kanila, igong kasakit nga makapahimo kanila ingon nga tawo, igong kapakyasan nga nakapakupot kanila sa hugot kanimo, ug igong kalampusan nga makapaila kanila nga sila nagauban kanimo.

Hinaut nga sila makaila sa kadaku sa bili sa ilang paghinigugmaay ug nga sila makasinati sa dili matukib nga pinulongan nga nag-ingon, "Gikan niining kalibutana ikaw nagpili kanako."

Sa diha nga ang kinabuhi matapus na ug ang adlaw talisalop na, hinaut nga sila makita nga magakuyog sama karon nga sa gihapon nagapasalamat k. nunay ngadto sa Dios alang sa usag usa, Hinaut nga sila magaalagad Kanimo nga malipayon, matinumanon, ug magkauban hangtud nga ang usa magpauraray sa usa ngadto sa mga bukton sa Dios.

Kini among gipangayo pinaagi kang Jesu Cristo, ang dakung mahigugmaon sa among mga kalag. Amen.

-Louis H. Evans, D.D., L.L.D.

Mga Tubag sa Leksyon 12

Kon ang tanan nimong tubag husto, markahi ang imong grado ug labing maayo; 3, maayo; 2, kasarangan. Kon mokubos sa 2 ang imong hustong tubag, basaha pag-usab ang leksyon.

2. ngadto sa impiyerno
3. ngadto sa langit
8. Iyang kaugalingong kinabuhi
11. Oo

Pila ang imong hustong tubag _____

Grado _____

Kon aduna pay laing mga estudyanteng mogamit niining libroha ug buot modawat ug sertipiko, palihug hangyo ug dugang kopya sa Rekord sa Estudyante alang kanila.

Usa ka sertipiko alang sa "KAMINYOON UG PANIMALAY" ang ihatag sa taga ka estudyanteng makatubag sa Rekord sa Estudyante.